

## **Instrución 2/2023, da Secretaría Xeral de Universidades e da Axencia Galega de Innovación para iniciar o procedemento de avaliación final do rendemento do persoal investigador contratado ao abeiro das axudas para completar a etapa de formación posdoutoral para ano 2021.**

A Orde do 31 de decembro de 2020 (DOG núm. 13, do 21 de xaneiro de 2021), conxunta da Consellería de Cultura, Educación e Universidade e da Vicepresidencia Segunda e Consellería de Economía, Empresa e Innovación, estableceu as bases para a concesión, en réxime de concorrencia competitiva, das axudas para completar a etapa de formación posdoutoral nas universidades do Sistema universitario de Galicia, nos organismos públicos de investigación de Galicia e noutras entidades do Sistema de I+D+i galego. A dita convocatoria dispón no seu artigo 21.2 un proceso de avaliación da actividade investigadora desenvolvida.

Este proceso realizarase a partir da documentación que se lles require ás persoas investigadoras que foron contratadas ao abeiro da citada orde polas universidades do SUG e polas demais entidades indicadas no artigo 2, e será realizado por un equipo avaliador formado por persoas expertas de fóra do Sistema de I+D+i galego.

De acordo co Decreto 79/2023, do 22 de xuño (DOG núm. 119, do 23.06.2023) polo que se fixa a estrutura orgánica das vicepresidencias e das consellerías da Xunta de Galicia e co Decreto 119/2022, do 23 de xuño (DOG núm. 126 do 04.07.2022), polo que se establece a estrutura orgánica da Consellería de Cultura, Educación, Formación Profesional e Universidades, correspóndelle á Secretaría Xeral de Universidades contribuír á ordenación e á complementariedade das capacidades investigadoras do Sistema Universitario de Galicia (en adiante, SUG), seguindo criterios de excelencia e consolidación no ámbito dos obxectivos que establezan os plans do Goberno galego en materia de investigación e innovación.

De acordo co Decreto 79/2023, do 22 de xuño (DOG núm. 119, do 23.06.2023), polo que se fixa a estrutura orgánica das vicepresidencias e das consellerías da Xunta de Galicia, e co Decreto 50/2012, do 12 de xaneiro (DOG núm. 19, do 27.01.2012), polo que se crea a Axencia Galega de Innovación e se aproban os seus estatutos, correspóndelle á Axencia Galega de Innovación definir e desenvolver políticas públicas dirixidas á captación e xestión do talento que permitan, no seu conxunto, incrementar o rendemento innovador das empresas e do Sistema Galego de Innovación.

En consecuencia, o secretario xeral de universidades e a directora da Axencia Galega de Innovación, no uso das competencias que teñen atribuídas, ditan a seguinte instrución:

1. Iniciar o procedemento que permita a avaliación das persoas investigadoras contratadas no Programa de axudas para completar a etapa de formación posdoutoral, da convocatoria do ano 2021 que finalizaran o programa.
2. A avaliación será realizada por persoas expertas alleas ao Sistema de I+D+i galego, coa colaboración da Axencia para a Calidade do Sistema Universitario de Galicia (ACSUG), a partir da documentación facilitada polas persoas interesadas. Neste proceso rexerán os principios xerais de obxectividade, independencia e calidade das avaliacións, e teranse en conta a documentación e os criterios sinalados nos puntos 4 e 5 desta instrución.

Esta avaliación cumprirá o disposto no artigo 21.2 das bases desta convocatoria, e as comisións



de avaliación correspondentes tomarán como referencia os criterios establecidos na Resolución do 2 de decembro de 2021, da Secretaría Xeral de Universidades do Ministerio de Universidades pola que se fixa o procedemento para a expedición das certificacións I3 a efectos do establecido na Lei 11/2020, do 30 de decembro, de Orzamentos Xerais do Estado para o ano 2021, modificada pola Resolución do 26 de xaneiro de 2022. Tendo en conta que o período formativo posdoutoral se desenvolveu en moitos casos condicionado pola pandemia Covid-19, complementariamente os equipos avaliadores poderán ter tamén en conta todas aquelas circunstancias sinaladas no artigo 18.3 da orde de convocatoria que deron lugar a interrupcións do contrato.

3. Para tal fin, as persoas interesadas deberán remitir, no prazo de quince días hábiles dende o día seguinte ao da publicación desta instrución, a documentación necesaria para a avaliación das axudas, na que se reflectirán os datos necesarios para avaliar o conxunto da traxectoria científico-tecnolóxica. O envío desta documentación deberá realizarse por medio do procedemento PR004A (Solicitud Xenérica da Sede Electrónica da Xunta de Galicia) e será remitida:

- Á Secretaría Xeral de Universidades, no caso de persoas contratadas por unha universidade do SUG;
- á Axencia Galega de Innovación no caso do resto de entidades.

4. A documentación terá que abranguer os seguintes aspectos:

- 4.1.- Currículo actualizado nun modelo normalizado (formato pdf), preferentemente no modelo da páxina web <https://cvn.fecyt.es/>. O currículo complementarase cos documentos xustificativos dos méritos alegados, xunto coas copias ou enlaces ás publicacións ou documentos científico-técnicos, contribucións a congresos, etc., e cun documento índice de cada un dos méritos alegados e xustificados que permita unha doada identificación de cada un deles, que se presentarán nun único documento pdf precedido dun índice.
- 4.2.- De acordo co indicado no anexo IV da Resolución do 2 de decembro de 2021, incluírase así mesmo un breve resumo das mellores achegas científico-técnicas da persoa solicitante e outro cunha relación dos méritos logrados (relativos aos apartados dos criterios de avaliación de Outros méritos curriculares, Internacionalización e Liderado).
- 4.3.- Memoria da actividade desenvolvida. Esta memoria poderá reflectir aquelas consideracións que a persoa entenda que deba facer constar e que sexan pertinentes para que o equipo avaliador poida modular os criterios atendendo ao contexto Covid-19 ou a calquera das circunstancias que supuxeron unha interrupción dos contratos de acordo coas causas recollidas no artigo 18.3 da Orde de convocatoria.

5. Criterios de avaliación

As solicitudes serán avaliadas de acordo cos seguintes criterios:

a) Achegas científico-técnicas. Valorarase a contribución da persoa candidata nos artigos publicados en revistas científicas, os libros ou capítulos de libros científicos e técnicos, os traballos presentados a congresos, as patentes concedidas ou licenciadas, e, en xeral, calquera outra achega que permita valorar os diferentes aspectos da investigación, incluíndo a transferencia de tecnoloxía.



- b) Outros méritos curriculares. Valorarase, entre outros aspectos, a dirección de teses de doutoramento e traballos de fin de mestrado universitario, a obtención de premios, mencións e distincións, actividades de divulgación científica e calquera outra achega que permita valorar méritos en investigación non incluídos nos anteriores apartados.
- c) Internacionalización. Valorarase a participación directa en accións relacionadas con programas e proxectos internacionais, especialmente relacionados con programas de mobilidade internacional predoutoral e posdoutoral, así como as publicacións, participación ou financiamento de proxectos e contratos realizados en colaboración internacional.
- d) Liderado. Valorarase a independencia investigadora da persoa avaliada mediante a súa participación como investigador/a principal en programas e proxectos de investigación nacionais, rexionais e/ou internacionais obtidos mediante concorrencia competitiva, incluídos os financiados por empresas e outras entidades privadas.

Santiago de Compostela, na data da sinatura dixital

O secretario xeral de universidades

José Alberto Díez de Castro

A directora da Axencia Galega de Innovación

Patricia Argerey Vilar

